

Četvrta naučna  
konferencija

**DRUŠTVENA KRIZA I  
SOCIJALNI RAD -  
"Buen Vivir":  
Zajednička budućnost  
za transformativnu  
promjenu**

**BUEN  
VIVIR**

*shared future for  
transformative  
change*



**FAKULTET  
POLITIČKIH  
NAUKA**  
UNIVERZITET U SARAJEVU  
MCMXLIX

**WORLD SOCIAL WORK DAY  
19TH MARCH 2024  
#WSWD2024**



[www.ifsw.org](http://www.ifsw.org)



Četvrta naučna konferencija  
**„DRUŠTVENA KRIZA I SOCIJALNI RAD -  
'Buen Vivir': Zajednička budućnost za transformativnu promjenu“**

Naš svijet se danas više nego ikada prije suočava s različitim krizama koje su na prvom mjestu uzrokovane ratnim sukobima, devastacijom okoliša, prisustvom trajnog siromaštva i političkim nejednakostima. S tim u vezi, socijalni rad, kao naučna disciplina, praktična djelatnost i pomažuća profesija, kroz neminovno prožimanje navedenih segmenata, mora se kontinuirano razvijati i usvajati inovativne, transformativne pristupe koje vodi zajednica i koji su prožeti autohtonom mudrošću. Središnje mjesto u ovoj transformativnoj promjeni je načelo 'Buen Vivir' koje ističe da je pravo blagostanje moguće postići kada zajednice žive u skladu sa prirodom i zajedničkom težnjom ka uravnoteženom razvoju.

Sukladno navedenom je i tema ovogodišnjeg 27. Svjetskog dana socijalnog rada: „'Buen Vivir': Zajednička budućnost za transformativnu promjenu“, koja se zapravo nadovezuje na prošlogodišnju temu: „Poštivanje različitosti kroz zajedničko društveno djelovanje“.

Ovogodišnjom temom se, također, naglašava važnost međusobne povezanosti, recipročnosti, korespondencije i komplementarnosti u ljudskim odnosima i našoj vezi s prirodom. Pri tome, pored zagovaranja načela 'Buen Vivir', cilj je i poticanje eko društvenog svijeta koji napreduje na uključivanju, međusobnom razumijevanju i poštivanju ljudskih prava. Drugim riječima, kako to ističe Sang-Mok Suh, predsjednik Međunarodnog vijeća za socijalnu skrb (ICSW): „Ova tema sažima bit onoga što socijalni rad predstavlja. Služi kako podsjetnik da, kako bismo doveli do značajne promjene, moramo prihvatiti i inicijative vođene zajednicom koje su utemeljene na autohtonoj mudrosti i skladnom životu s prirodom. To je poziv na jedinstvo, saradnju i transformativno djelovanje.“

Sve pobrojano upućuje na zaključak da se ovogodišnjom temom naročita pažnja

posvećuje transformativnoj ulozi socijalnih radnika u pokretanju pozitivnih promjena koje se, sukladno temeljnim vrijednostima socijalnog rada, zasnivaju na međusobnom poštivanju i održivosti, gdje, kako to ističe Joachim Mumba, predsjednik Međunarodne Federacije socijalnih radnika (IFSW), kroz koegzistenciju zajednice i prirode socijalni radnici zajedno s lokalnim stanovništvom grade mirne zajednice ključne za našu zajedničku održivu budućnost.

Na tragu navedenog, kroz promišljanje kako u konkretnim uslovima života u BiH ispoštovati pobrojana načela budući da praksa socijalnog rada vezana za zajedničku budućnost u uslovima društvene krize može, a često i jeste, biti opterećena različitim dilemama, kao moguće rješenje ističemo njezino razumijevanje na mikro i makro nivou. S tim u vezi, na mikro nivou postavlja se pitanje: na koji način praksa socijalnog rada može doprinijeti zajedničkoj budućnosti za transformativne promjene u smislu ukidanja nejednakosti i poštivanja zahtjeva za socijalnom pravdom i jednakošću? Na makro nivou se na prvom mjestu postavlja dilema u vezi s pitanjem: šta istinsko blagostanje u smislu života zajednice u skladu s prirodom zapravo znači u praksi? Ovo posebno što je jedna od karakteristika bosanskohercegovačkog društva prisustvo mnogostrukih društvenih podjela koje se odnose na etničke, političke, regionalne, klasne i druge segmente. Uz navedeno, opterećenost različitim krizama: uništavanje okoliša, kontinuirano siromaštvo i posebno socijalne i političke nejednakosti su stvarnost svakodnevnog života u Bosni i Hercegovini.

Polazeći od ukupnog stanja, a posebno od doprinosa socijalnih radnika u smislu profesionalne odgovornosti i posvećenosti svakodnevnom radu na poboljšanju uslova života i humanijim odnosima u društvu, čim omogućavaju, posebno najvulnerabilnijim društvenim skupinama i pojedincima pristup socijalnim uslugama i ostvarivanje ljudskih prava, Odsjek za socijalni rad Fakulteta političkih nauka Univerziteta u Sarajevu organizira Četvrtu naučnu konferenciju: „DRUŠTVENA KRIZA I SOCIJALNI RAD“, koja će ove godine biti posvećena temi: „'Buen Vivir': Zajednička budućnost za transformativnu promjenu“.

Cilj konferencije: dati doprinos promišljanju o primjeni načela 'Buen Vivir', odnosno načinu života u harmoniji sa zajednicom, s nama samima i najvažnije s prirodom, sukladno smjernicama Globalne agende za socijalni rad i socijalni razvoj 2020. – 2023. godina, s fokusom na izazove s kojima se suočavaju savremene zajednice u održivosti i promišljanjima o temeljnim potrebama i pravima ranjivih skupina i pojedinaca, te mogućnosti njihovog ostvarenja.

Konferencija je zamišljena kao mjesto prezentacije, diskusije i kritičkih refleksija,

inovativnih politika, programa i pristupa profesionalnog socijalnog rada u promoviranju i zagovaranju eko društvenog svijeta koji napreduje na uključivanju, međusobnom razumijevanju i poštivanju ljudskih prava.

Prihvaćeni radovi bit će objavljeni u e-zborniku.

Plenarno predavanje održat će poznata i uvažena regionalna stručnjakinja prof. dr. Maja Gerovska Mitev (Filozofski fakultet Univerziteta „Sveti Ćiril i Metodij“ u Skoplju). Više o predavačici na: <http://fzf.ukim.edu.mk/en/maja-gerovska-mitev-phd/>

**Konferencija će se održati 19. marta 2024. godine (utorak)** u hibridom modelu (uživo i putem ZOOM aplikacije) na Fakultetu političkih nauka Univerziteta u Sarajevu (adresa: Skenderija 72).

Potencijalni učesnici učešće na konferenciji mogu prijaviti (uz priložen sažetak izlaganja od maksimalno 150 riječi) do **4. marta 2024. godine** putem email adrese: [svjetski.dan.socijalnog.rada@fpn.unsa.ba](mailto:svjetski.dan.socijalnog.rada@fpn.unsa.ba)

*Za Organizacijski odbor*

*prof. dr. Borjana Miković*

*Borjana Miković*